



*Sabtu, 20 November 2021*  
**Ogen: Masmur 86:12**



**Lalap Ngataken Bujur**



**H**and sanitaizer i bas jaman enda enggo jadi bagin geluhta tep-tep wari. Gunana eme guna murihi tanta arah bakteri ras virus penyebab pinakit, gelah kita terlindungi. Zat pembersih si lit i bas *hand sanitizer* munuh sebagian besar kuman-kuman jahat, maka la bengket kuman e ku bas dagingta. Janah ianjurken kita makesa reh rusurna reh sikapna. Dung si salamen ras kalak, dung njemak barang-barang, muat man, dung njemak sen ras sidebanna. Alu bage nggo tetap ukurta. Kira-kira pengataken bujur bas diri kalak Kristen e, bali ras fungsi *hand sanitizer*. Kita perlu lalap ngataken bujur. Ngataken bujur bas pasu-pasu Tuhan, ban lit buataenta, sikap pendahinta, banci dengan erkesah tep-tep erpagi-pagi, banci dengan ngidah ras nggejabken kebersamaan ras keluarga ras sidebannad. Bagepe ngataken bujur i bas litna pergumulan geluh. Sabap alu kita ngataken bujur, kita mpedauh kuasa-kuasa jahat si atena meneken kita arah cara rukur si la payo, cara rukur si negative. Ngataken bujur, desken raja Daud, labo saja bas kesenangan, tapi pe bas kesusahen. Sabap arah ngataken bujur e, perukuren Daud iubahken, mata pusuhna ibukaken ras pengarapenna ipeturah Dibata. Arah rusurna ngataken bujur man Tuhan, reh rembakna kita ras Tuhan, reh sehatna kinitekenta. Ngataken bujur e, tanda kedewasan kiniteken, maka sigejapken Tuhan kap si ngaturken kegeluhenta, janah kerina sinibahanNa mehuli kerina.

Masmur 86 enda emekap pertoton si ncidahken bukti penalemen man Tuhan, si patut si usih i bas geluhta. Amin gia i bas kiniseran tetap ngataken bujur man Tuhan. Mawen kita gedap kal bas perbeben e, lupa kita maka Tuhan erkuasa. Tetapken pusuhta, ras ngataken bujurlah tetap man Tuhan, IA la terjeng ngasup nampati kita, IA nggit segera mulahi kita bas kiniseranta e nari.